



PARTORDING NI PARMINGGUON DI MINGGU III dung EPIPHANIAS

☐ Ev. Jona 3 : 1 – 10

☐ p. Markus 1 : 14 – 20

**TOPIK:
ASI NI ROHA NI DEBATA PALUAHON**



**HURIA KRISTEN BATAK PROTESTAN
KRAMAT JATI**

Minggu, 24 Januari 2021

01. PAMUHAI :

U : Selamat ari Minggu tu hita saluhutna. Masuk ma hita tu Minggu III dung Epiphantias, ditogihon do hita marsomba tu Debata, marhite topik ni Minggu : **ASI NI ROHA NI DEBATA PALUAHON**. Antong dibagasan serep dohot unduk ni roha, tapangiar ma soaranta mamuji Tuhan Debata. Marende ma hita!

02. Marende BE No. 17 : 1, 3 “RAJA NA TUMIMBUL”

- ❖ *Raja na tumimbul Sigomgomi hami Jalo ma pujiannami
Denggan ni basaM do Pangoluhon hami Atik pe mardosa hami
Sai apoi pargogoi hami mangendehon SangapMi o Tuhan
=== Jongjong ===*
- ❖ *Dohot do tondingku Tungkap di adopan ni habangsaMi o Tuhan
Nang sude donganku Nasa na marhosa Pujionna do Jahowa
Sai tongtong Na sintong Holan Debatanta Do sipujionta.*

03. VOTUM – INTROITUS – TANGIANG:

U : *Marhitehite Goar ni Debata Ama, dohot Goar ni AnakNa Tuhan Jesus Kristus, dohot Goar ni Tondi Porbadia na tumompa langit dohot tano on. Amen.* Puji ma Jahowa, hamu ale angka surusuruanNa. Dibege Sion do i, jadi marlas ni roha ma, marolopolop ma angka boru ni Juda, ala ni panguhumMu ale Jahowa ! Jahowa do Raja marolopolop ma tano on, marlas ni roha ma pulo angka na lan i. Haleluya!

R : (Mangendehon): Haleluya, Haleluya, Haleluya!

U : **Martangiang ma hita** : Ale Tuhan Debata, Ama na marasiroha! Hudok hami mauiate tu Ho, sian nasa rohanami, ala dijou Ho hami sian haholomon tu hatiuron, marhitehite AnakMu Tuhan Jesus Kristus. Sai dirajai TondiM na badia i ma hami asa lam ganda haporsesonnami, jala asa lam badia parangenami, unang marlindang binahen ni portibi on, asa sahat hami rap dohot angka na porsea di GoarMu tu

hangoluan na so ra suda, marhitehite Anak haholongan ni rohaM, Tuhan Jesus Kristus, Tuhannami. Amen. **(Hundul)**

04. Marende BE No. 74 : 2 “SAI MARLASNI ROHA HITA”

- ❖ *Tuhan Jesus do Rajanta, na manggomgom sasude Niramotan ni tanganNa do luhut parhosa pe Molo lao hataNa i ndang tarbaen so saut be i Sai na tulus do nidokNa di saluhut manisia.*

05. PATIK:

U : Tangihon hamu ma Patik ni Debata di Minggu III Dung EIPHANIAS sadari on, I ma **Patik Partoluhon dohot Lapatanna** : ***“Ndang jadi dohonon goar ni Debata, ianggo so ture dalanna. Ai hona uhumNa do sogot angka na marsineang di goarNa. Dia do lapatan ni i? On do: Ingkon dihabiani rohanta Debata jala ingkon holong rohanta di Ibana, asa unang hita olo mamurai manang manolonolon manang marujarujaran na roa, manang margagap, manang mangansi marhitehite goar ni Debata; ai di na tarsosak dohot di hasusaan dohot ditangiang dohot pujipujian do sidohonon goar ni Debata. (I do sahatna. Rap mangido gogo ma hita tu adopan ni Debata, laho mangulahon PatikNa i)***

R : Ale Tuhan Debata, sai pargogoi ma hami mangulahon na hombar tu PatikMi. Amen.

06. Marende BE No. 686 : 1 - 2 “RAMUN DO AU”

- ❖ *Ramun do au di joloMi, gok dosangki urasi au O, Jesus, birubiru i, dison do au patau ma au. **(Jongjong)***
- ❖ *Na ro do au tu joloMi, Gale do au urupi au O, Jesus, ala mudarMi. Dison do au patau ma au.*

07. MANOPOTI DOSA:

U : Tatopoti ma dosanta tu adopan ni Debata, martangiang hita : Ale Amanami jala Debatanami na di banua ginjang. Parasiroha na sumurung mida hami! Huparhatutu jala hutopoti hami do dosa dohot pangalaosionnami na godang i di joloM. Tatap hami marhitehite asi ni rohaM, jala sesa ma dosanami saluhutna, ala ni panghophop ni Anak haholongan ni rohaM, Tuhan Jesus Kristus, Sipangolu hami. Amen.

---- (*Martangiang na hohom, instrumen*)----

U : Bagabaga ni Debata taringot tu hasesaan ni dosanta: Parasi roha jala pardengganbasa do Jahowa, lambat tarrimas jala Parasiroha godang. Ndang dibahen tu hita hombar tu angka dosanta, jala ndang dibaloshon tu hita hombar tu angka hajahatonta. Songon asi ni roha ni amaama mida angka anakna, asi ni roha ni Jahowa di angka na manghabiari Ibane. Hasangapon ma di Debata na di ginjang!

R : Amen (Hundul)

08. Marende BE No. 174 : 4 "TOROP DOPE"

❖ *Haporseai ma hata i, ai i do haluaon
Haposi Tuhan Jesus i, mudarNa i ma golom
Ai nang gok dosa rohami, malua ho bahenon ni
Tutu, tutu, malua baenon ni.*

09. EPISTEL :

U : Hata ni Debata turpuK Epistel di Minggu III Dung Epiphantias sadarion, tarsurat di **Markus 1: 14 - 20**. Alai dung dihurungkon si Johannes, ro ma Jesus tu luat Galilea manjamitahon barita na uli ni Debata.

R : Ninna do : Nunga dapot tingkina; nunga songgop harajaon ni Debata. Pauba hamu ma rohamuna, jala haporseai hamu ma barita na uli i!

U : Dung i di na mardalani Ibana di topi ni tao Galilea, diida ma si Simon dohot si Andreas, dongan saama ni si Simon, na sumampakkon jalana tu tao i, ai panjala do nasida.

R : Jadi didok Jesus ma tu nasida: Ihuthon hamu Ahu; bahenonku do hamu sijala jolma!

U : Pintor ditadingkon nasida ma jala i, laos mangihuthon Ibana.

R : Jadi dung dumao otik didalani sian i, diida ma si Jakobus, anak ni si Sebedeus, dohot si Johannes, donganna saama i, di bagasan parau do nang nasida patureturehon jalanasida.

U : Dung i manigor dijou ma nasida, gabe ditadingkon nasida ma amanasida, si Sebedeus na di parau i rap dohot angka anak gajianna, laos ro do nasida mangihuthon Ibana. **I do sahatna.** Martua ma angka na tumangihon Hata ni Debata jala na umpeopsa. Amen.

10. Marende BE No. 183 : 2, 4 "NA JUMPANG AU"

❖ *Dibahen godang ni dosangku, tung hona uhum au tama Hape ro Jesus dipadomu, au muse dohot Debata MudarNa na badia i, pajongjong pardomuan i, pajongjong pardomuan i. (Jongjong)*

❖ *Ianggo i ndang taragohon, baenon ni manang aha pe Sai asiMi hupangasahon, di tangiangku sasude Mate pe au, pos rohangki, marningot asiasiMi, marningot asiasiMi.*

11. MANGHATINDANGHON HAPORSEAON:

U : Tahatindingkon ma haporseaonta i, songon na hinatindingkon ni donganta sahaporseaon di sandok portibi on. Rap ma hita mandok:

R : Ahu Porsea..... (Hundul)

12. TINGTING

13. Marende BE No. 443 : 1, 3 “DUNG TUHAN JESUS”

- ❖ *Dung Tuhan Jesus nampuna au, songgop dameNa, biarhu lao,
Taripar gogo ngoluna i, nasa dosangku naung sae do i.
Tabaritahon holongNa i, di dia Tuhan, tudoshon i?
Tuk manumpahi, tarlobi da? Sasada Jesus pinuji ma!*
- ❖ *Hibul ma ahu, Jesus di Ho, sonang rohangku, tarapul do.
Mian di au ma baen hataMi, paima das au tu lambungMi
Tabaritahon holongNa i, di dia Tuhan, tudoshon i?
Tuk manumpahi, tarlobi da? Sasada Jesus pinuji ma!*

14. JAMITA : Jona 3 : 1 – 10

15. Marende BE No. 187 : 1--- “DENGGAN DO PANOGUM”

(Pel. Ia, Ib & II Pusat)

- ❖ *Denggan do panoguM ale Jahowa,
Di angka na pinarmahananMi
Tagamon baheononMu ma na roa,
So tarbunihon Ho do burjuMi?
Jotjot suhar do pambahenanMi, di roha ni na so tumanda Ho
Alai marhite sian i do ro, tu hatiuron na tinoguMi.
=== Musik ===*
- ❖ *Tung patik angka na binaen ni jolma,
Ma ihuthonon ni Tondim disi?
Ho na tongtong sumurung i marroha
Sai ingkon pasautonMu tahiMi
Sai talu do na hum mangalo Ho, dipangke pe sude gogona i
Ai Ho do na so halompoan i, na tinahiM sai ingkon jumpang do.
=== Musik ===*
- ❖ *Dialo Ho sude na jungkat roha
Na timbo i dipatutoru Ho
Alai sude na serep i marroha
I do na sai diasiasi Ho
Parhata na gogo di tano on, di hagigihon rohaMi sude
Na dangol i ditatap Ho hape, naeng urupanMu angka i tongtong*

16. PANGUJUNGI: (Jongjong)

U : **Tatangianghon ma peleanta:** Ale Debata, Amanami na di banua ginjang, Ho do haroroan ni saluhut silehonlehon na denggan dohot nasa ulibasa na mauiutus. Hupasahat hami ma sian na nilehonMi tu hami, peleannami tu Ho. Sai jalo ma i gabe uap na hushus di joloM. Pasupasu ma i jala ramoti asa huparhaseang hami pelean on, patimbulhon harajaonMu di tongatonga ni huriaM dohot di portibi on. Buhai ma rohanami marhitehite TondiM, asa lam hutanda hami godang ni silehonlehonMi tu hami, asa lam girgir hami mandok mauiate tu Ho, marhitehite Jesus Kristus Tuhannami. AMEN

R : **(Mangendehon) BE No. 204 : 2 NDANG TADINGKONONHU HO**

❖ *Nasa na nilehonMi, tondi ro di pamatanghu.*

Hosa dohot gogongki, ro di saluhut artanghu.

Hupasahat i tu Ho, na so unsatonhu do.

U : Ale Amanami na di banua ginjang! Sai pinarbadia ma GoarMu! Sai ro ma harajaonMu! Sai saut ma lomo ni rohaM di banua tonga on songon na di banua ginjang! Lehon ma tu hami sadari on hangoluan siapari! Sesa ma dosanami songon panesanami di dosa ni dongan na mardosa tu hami! Unang hami togihon tu pangunjunan! Palua ma hami sian pangago!

R : **(Mangendehon):**

❖ *Ai Ho do nampuna harajaon, dohot hagagoon.*

Ro di hasangapon, saleleng ni lelengna, Amen

U : Pasupasu !

R : **(Mangendehon) Amen, Amen, Amen.**